

KERATAN AKHBAR

TARIKH : 12 JULAI 2023
AKHBAR : BERITA HARIAN
MUKA SURAT : 2

Negara rugi RM18b akibat Ali Baba



Negara rugi RM18b akibat Ali Baba

Kerajaan rangka dasar hapuskan amalan elak terus jejas ekonomi

Oleh Mahanum Abdul Aziz dan Irwan Shafrizan Ismail
bhnews@bh.com.my

Putrajaya: Kerajaan sedang merangka dasar anti-Ali Baba bagi menangani kesan negatif budaya itu terhadap ekonomi negara.

Amalan Ali Baba dijangka akan mengakibatkan kerugian mencecah sekitar satu peratus daripada Keluaran Dalam Negara Kasar (KDNK) atau kira-kira RM18 bilion berdasarkan kiraan tahun lalu.

Mengikut Laporan Jabatan Perangkaan, KDNK Malaysia keseluruhan tahun lalu adalah RM1.79 trilion dan satu peratus daripadanya adalah berjumlah kira-kira RM16 bilion.

Ali Baba ialah satu sistem perniagaan yang memakai nama Melayu (Ali) atau diuruskan oleh orang Melayu tetapi sebenarnya kepunyaan orang Cina (Baba) atau bangsa asing yang lain. Sebagai contoh seorang peniaga Melayu mendapat kontrak atau lesen, tetapi menjual atau menyewa kepada bangsa lain untuk keuntungan atas angin. Pihak yang mendapat keuntungan ialah orang asing.

Dalam satu kenyataan semalam, Datuk Seri Anwar Ibrahim, berkata perkara itu dipersetujui dalam Mesyuarat Majlis Tindakan Ekonomi Negara (MTEN) yang diadakan di sini, kelmarin.

Kerugian satu peratus daripada KDNK itu membabitkan aspek perolehan, pelesenan, pem-

berian permit dan kuota, serta pemberian subsidi dan geran, katanya.

Perdana Menteri berkata, Kementerian Ekonomi dan Jabatan Penguatkuasaan Negara dengan kerjasama beberapa kementerian dan agensi kerajaan akan mengkaji, merangka dasar serta strategi perundangan bersesuaian untuk membanteras kegiatan Ali Baba dan membentangkan cadangan kepada Jemaah Menteri.

Mesyuarat MTEN semalam (kelmarin), bersetuju secara prinsip budaya Ali Baba memberi dampak negatif kepada ekonomi dan kerajaan serius untuk menanganinya dan membasmi aktiviti itu.

"Anggaran kerugian mencecah sekitar satu peratus daripada KDNK dan membabitkan aspek perolehan, pelesenan, pemberian permit dan kuota serta pemberian subsidi dan geran," katanya.

Percepat inisiatif NETR

Anwar berkata, mesyuarat MTEN turut bersetuju mempercepat inisiatif Pelan Hala Tuju Peralihan Tenaga (NETR) sebagai pemangkin kepada strategi mengangkat negara sebagai penentu serantau tenaga boleh baharu.

Peluncuran Fasa Pertama NETR akan diadakan pada 27 Julai ini, disusuli Fasa Kedua pada Ogos depan.

"Fasa pertama NETR akan mengetengahkan 10 projek rintis perdana yang strategik dan bernilai tinggi sebagai Dasar Tenaga Negara 2022-2040 dengan jangkaan pelaburan bernilai RM25 bilion.

"Ia akan mewujudkan 23,000 pekerjaan berkualiti tinggi dan menurunkan pelepasan karbon dioksida setara melebihi 10,000 gigagram secara bertimbulan," katanya.

Sementara itu, Ketua Ekonomi dan Analisis Pasaran dan Kewangan Sosial Bank Muamalat Malaysia Bhd, Dr Mohd Afzanizam Abdul Rashid ketika diminta mengulas cadangan merangka dasar untuk membanteras kegiatan Ali Baba, berkata satu peratus daripada KDNK pada tahun lalu berjumlah kira-kira RM18 bilion yang mana jumlah itu adalah sangat besar.

Katanya, budaya Ali Baba adalah isu tata kelola yang perlu dibanteras habis-habisan memandangkan ia berpotensi menjejaskan daya saing negara, selain menutup peluang kepada mereka yang berkecayakan.

Bellau berkata, amalan itu juga berpotensi meningkatkan kos operasi apabila Kontraktor yang dilantik tidak mempunyai pengalaman atau skala ekonomi untuk melaksanakan projek kerajaan. Justeru, jelasnya, wang pembayar cukai akan dibazirkan kerana peningkatan produktiviti tidak dapat dicapai.

"Ini juga boleh memberi kesan kepada daya saing negara kerana yang berkecayakan mungkin akan berpindah dan mencari peluang yang lain di luar negara," katanya.

Professor Adjung Tun Ahmad Sarji School of Government and Public Services (TASSGPS) Universiti Tun Abdul Razak (UNIRAZAK), Dr Zulkiply Omar, berkata reformasi institusi perlu bagi membendung kegiatan Ali Baba.

Katanya, jika tidak ditangani, ia akan menyebabkan ketidakcekapan dan salah agihan sumber.

"Antara langkah penting perlu diambil adalah meningkatkan ketelusan dalam semua proses, seperti perolehan, pelesenan, pemberian permit dan kuota, serta pemberian subsidi dan geran," katanya.